

本期主持：Chen

01

赠蔡子笃诗

〔蔡睦。字子笃。为尚书。仲宣与之同避难荆州。子笃还会稽。〕

翼翼飞鸾，载飞载东。
我友云徂，言戾旧邦。
舫舟翩翩，以溯大江。
蔚矣荒涂，时行靡通。
慨我怀慕，君子所同。
悠悠世路，乱离多阻。
济岱江衡，邈焉异处。
风流云散，一别如雨。
人生实难，愿其弗与。
瞻望遐路，允企伊伫。
烈烈冬日，肃肃凄风。
潜鳞在渊，归雁载轩。
苟非鸿雕，孰能飞翻。
虽则追慕，予思罔宣。
瞻望东路，惨怆增叹。

率彼江流，爰逝靡期。
君子信誓，不迁于时。
及子同寮，生死固之。
何以赠行，言赋新诗。
中心孔悼，涕泪涟洏。
嗟尔君子，如何勿思。

02

七哀诗三首 其一

西京乱无象，豺虎方遘患。
复弃中国去，远身适荆蛮。
亲戚对我悲，朋友相追攀。
出门无所见，白骨蔽平原。
路有饥妇人，抱子弃草间。
顾闻号泣声，挥涕独不还。
未知身死处，何能两相完。
驱马弃之去，不忍听此言。
南登霸陵岸，回首望长安。
悟彼下泉人，喟然伤心肝。

03

七哀诗三首 其二

荆蛮非我乡，何为久滞淫。
方舟溯大江，日暮愁我心。
山冈有馀映，岩阿增重阴。
狐狸驰赴穴，飞鸟翔故林。
流波激清响，猴猿临岸吟。
迅风拂裳袂，白露沾衣襟。
独夜不能寐，摄衣起抚琴。
丝桐感人情，为我发悲音。
羁旅无终极，忧思壮难任。

04

七哀诗三首 其三

边城使心悲，昔吾亲更之。
冰雪截肌肤，风飘无止期。
百里不见人，草木谁当迟。
登城望亭燧，翩翩飞戍旗。
行者不顾反，出门与家辞。
子弟多俘虏，哭泣无已时。
天下尽乐土，何为久留兹。
蓼虫不知辛，去来勿与咨。

05

公燕诗

昊天降丰泽，百卉挺葳蕤。
凉风撤蒸暑，青云却炎晖。
高会君子堂，并坐荫华榰。
嘉肴充圆方，旨酒盈金罍。
管弦发徽音，曲度清且悲。
合坐同所乐，但慙杯行迟。
常闻诗人语，不醉且无归。
今日不极欢，含情欲待谁。
见眷良不翅，守分岂能违。
古人有遗言，君子福所绥。
愿我贤主人，与天享巍巍。
克符周公业，奕世不可追。

06

咏史诗

自古无殉死，达人所共知。
秦穆杀三良，惜哉空尔为。

结发事明君，受恩良不訾。
临没要之死，焉得不相随。
妻子当门泣，兄弟哭路垂。
临穴呼苍天，涕下如绠縻。
人生各有志，终不为此移。
同知埋身剧，心亦有所施。
生为百夫雄，死为壮士规。
黄鸟作悲诗，至今声不亏。